

四庫全書

集部

欽定四庫全書

文忠集卷八十四

宋 歐陽修 撰

內制集三

河南府平陽洞河陽濟瀆北海水府投送龍簡青

詞 八月二十六日

伏以九區至廣萬物類居惟川嶽之宅靈繫真仙而總
治載稽道祕實有舊章粲然玉簡之清文蜿若金鱗之

瑞質茲為鎮信輔以精誠伏冀冲鑒照臨純祺錫羨保
邦家之永固均動植以蒙休

雄州開啟北朝皇帝盡七道場齋文

八月二十六日

伏為

一作以

北朝皇帝世結隣歡歲交聘問方睦敦隆之

好遽聞訃告之音深極哀懷用伸資薦廣梵筵而斯啟
陳法供以惟嚴冀仰助於仙遊庶永孚於冥祐

班荆館賜北朝告哀人使御筵口宣

八月二十六日

卿載馳使介來訃國哀當節物之凜秋嘉道塗之良苦

宜頒燕犒以示眷勤

班荆館賜契丹告哀人使酒果口宣

八月二十六日

卿載馳國訃來及都城顧惟跋履之勞宜有頒宣之寵
俾推珍錫式示眷懷

故秦晉國夫人林氏祭文

堂祭八月二十六日

維靈歸全叶禮卜吉有期念將閔於幽扁俾載陳於祖
奠歆茲芳潔尚體追懷

故秦晉國夫人祭文

墳祭八月二十六日

維靈壽考有終勞能可錄安茲宅兆備有物容載申奠
訣之恩式盡追榮之美

內中福寧殿罷散三長月祝聖壽道場青詞

八月三十日

日

伏以清霜肅候資萬物以將成嘉月齋心延百祥而並
集有嚴祕殿來格衆靈冀真鑒之妙冲答精衷之蠲潔
保鴻圖而綿固均庶品以阜康

契丹告哀人使回至北京賜御筵口宣

九月四日

卿遠將國命來告訃音當使傳之言旋俾宴需之加錫
用申眷勞式示寵恩

契丹告哀人使回至雄州賜御筵兼傳宣撫問口

宣

九月
四日

卿遠馳國訃旋飭使輶載嘉復令之勤爰錫示慈之宴
式彰寵數宜體至懷

賜鎮海軍節度使檢校太尉同中書門下平章事

判亳州陳執中生日禮物口宣

九月
四日

卿榮擁節旄出臨蕃翰屬茲誕日宜有寵頒當體眷懷
克膺茂數

太平興國寺開先殿開啟太祖皇帝忌辰道場齋

文

九月
八日

伏以紹百王而開統昭著於祖功植衆善之妙因爰憑
於覺力循有邦之舊典稽諱曰以先期載肅齋場並延
淨侶瞻玉毫之具相誦貝葉一作葉之靈文仰依慈慧之
仁遐薦清真之馭庶資冥祐式廣孝思

太平興國寺開先殿開啟太祖皇帝忌辰道場功

德疏右語

九月八日

伏以受命造邦耀無窮之丕烈以時薦福資妙用於能
仁爰及諱辰式遵彞憲即神居之寶殿延法侶於祇園
仰冀覺慈廣敷勝利威靈如在冥助於真遊運祚克昌
永隆於卜世

賜西南蕃蠻人張漢頂等勅書

九月十二日

勅張漢頂省所附進馬并硃砂等事具悉汝世安邊徼

遠效欵誠涉道里以甚勤脩貢輸而自達載嘉忠順宜
有寵頒今回賜汝紅中錦旋襪一領八兩渾鍍銀腰帶
一條衣著二十疋至可領也故茲示諭想宜知悉秋冷
汝比好否遣書指不多及

增脩青帝朝日風師先蠶等壇祭告逐壇并當處

土地祝文

九月十
二日

壇壝之嚴神明所格以時修舊式叶彝儀涓此吉辰用
伸昭告

皇帝回契丹皇帝告哀書

九月日伯大宋皇帝致書於姪大契丹皇帝闕下特枉
使輶遽馳國訃不意凶變文成皇帝上僊載念久敦世
好方睦隣歡聞問震驚撫懷感惻姪皇帝始茲纘紹深
極哀摧莫節至情以遵典禮已差人使專持慰禮今右
宣徽使忠順軍節度使左金吾衛上將軍耶律元亨回
奉書陳謝不宣白

皇帝回契丹皇太后告哀書

九月日姪大宋皇帝謹致書於嬪大契丹仁慈聖善欽
孝廣德安靜正淳懿和寬厚崇覺儀天皇太后闕下不
意凶變文成皇帝上僊方敦隣睦遽及訃音載惟慈慕
之懷必極哀傷之念冀從順變式副瞻言已差人使專
持慰禮今右宣徽使忠順軍節度使左金吾衛上將軍
耶律元亨回奉書陳謝不宣謹白

贈昭信軍節度使遂國公宗顏祭文

堂祭九月
十三日夜

維汝幼而敏明長克有立胡謂為善而不永年奠尊在

茲營魂其慰

贈昭信軍節度使遂國公宗顏祭文

攢所九月十三日

維汝稟質甚秀享齡不遐日月有期厝安惟吉陳茲奠酌實悼余懷

賜右領軍衛將軍克冲獎諭勅書

九月十五日

朕覽先帝之餘文愴然增慕嘉汝志之專學期乃有成
一作惟睿制之坦明合聖經之

雅奧傳寫之善茲謂藝

能誦習不忘是為寶訓宜加褒勗以勉進修

吳王院上梁祭告土地祝文

九月十五日

本支之盛棟宇有嚴吉日既涓脩梁始構冀神之祐永壯厥居

南京鴻慶宮開啟皇帝本命道場青詞

九月二十三日

伏以帝運開先建別都而雄壯神遊欽奉肅真館以邃嚴適臨元命之辰恭按仙科之式薦茲嘉潔仰彼穹靈敢祈善應之祥永固無疆之壽

賜鎮海軍節度使檢校太尉同中書門下平章事

判亳州陳執中詔

十月二日

卿近辭宰柄出守蕃宣方受署以云初效右牽而來獻式彰誠蓋深用歎嘉

賜知建昌軍張貴和勅書

十月二日

敦本勸農惟汝之職因時任土脩貢有儀載省勤誠用增獎歎

啟聖禪院脩設故秦晉國肅恭賢正夫人林氏盡

七大會齋一中齋文

十月二日

伏以覺慈廣被兼濟於含生冥福所資必憑於慧力惟懿柔之東德享壽考而有終隆睿眷以不忘集勝緣而增備願乘妙果一作道超薦真乘

賜吏部尚書同中書門下平章事文彥博生日禮

物口宣

十月二日

卿以名世之材當秉鈞之任乃顧具瞻之重適臨載誕之辰爰示頌宣用彰眷遇

西太一宮開啟皇帝本命道場青詞

至和三年正月十五日

伏以真遊所集靈宇載嚴聿臨元命之辰恭按仙科之
式冀紫清之垂鑒感蠲潔以潛通百福來臻克彰於善
應萬齡增固永保於無疆

撫問麟府代州路臣寮口宣

二月五日

卿等各蘊才猷出膺寄任綽著綏寧之績克彰勤蓋之
汝勞宜示撫存用推眷遇

皇帝回契丹太皇太后回謝書

三月日姪大宋皇帝謹致書於嬪大契丹仁慈聖善欽

孝廣德安靜正淳懿和寬厚崇覺儀天太皇太后闕下
嚮以訃音來告方深感愴之懷贈禮是將用繼講修之
好豈期懿念復枉使車且承春候之和克固壽康之福
其於感慰罔罄敷陳今順義軍節度使左監門衛上將
軍蕭佺等回專奉書陳謝不宣謹白

皇帝回契丹皇帝回謝書

三月日伯大宋皇帝致書於姪大契丹皇帝闕下頃承
哀訃嘗遣使輶惟久睦於仁隣俾往伸於賻綏復蒙惠

問仍示典儀方此春和克支福履其為慰悅奚既名言
今順義軍節度使左監門衛上將軍蕭佺等回專奉書
陳謝不宣白

建隆觀翊教院開啟皇帝本命道場青詞

閏三月四日

伏以道妙無方默運清真之氣日纏有次式臨元本之
辰恭按仙儀俾陳淨醮伏願蒼靈昭鑒福嘏駢臻萬壽
無疆永隆於鴻筭羣生咸遂均被於餘休

賜侍衛親軍步軍副都指揮使涇州觀察使王凱

赴闕茶藥口宣

二十
五日

卿遠戒戎車夙祗召節式及災薰之候載惟道路之勤
宜頒飲劑之良用示眷懷之厚

賜龍圖閣直學士給事中施昌言已下為脩河了

畢御筵口宣

四月
四日

卿等分庀工徒繕修提鍵遽茲訖事嘉乃有成宜推宴
犒之恩用獎勞能之効

賜鎮東軍節度觀察留後知潁州李端愿赴闕茶

藥詔八日

卿出布詔條入祗召節屬此炎歊之候深惟道路之勤
宜頒藥劑之良用示眷懷之厚

賜契丹賀乾元節國信使副生餽口宣

八日

卿等式將聘幣來講隣歡載嘉道路之勤宜厚餽牽之
品往膺寵錫用示眷懷

賜文武百官文彥博已下於大相國寺罷散乾元

節道場香合口宣

八日

卿等式因誕節祇率采寮脩梵供以惟精罄臣誠而申祝載嘉忠愛宜示頒宣

賜文武百官文彥博已下於錫慶院罷散乾元節道場酒果兼教坊樂口宣

八日

卿等叶德同寅愛君盡禮因誕彌之紀節申祝頌之常儀宜示宴私用彰優寵

大慶殿行恭謝之禮御札

五月二日

勅内外文武臣寮等執珪璧以事神嚴祖宗而配帝雖

有國之常典亦因時而制宜朕承三聖之丕基撫萬邦
之有衆儉於已思天下之民豐勞於心致天下之民佚
罔敢怠忽庶幾治一作洽平而首春以來偶爽調適賴三

靈敷祐百福來臻順以節宣獲茲康祐加以邊隅不聳
風雨以時雖庶物之咸和顧眇躬之一作而增惕是用稽

先朝之成憲詢故實於有司即廣殿之翼嚴擇靈辰之
良吉式伸昭謝以格純休宜示先期俾茲誕告朕取今
年九月內於大慶殿行恭謝之禮其今年冬至親祀南

郊即宜權罷所有合行諸般恩賞並特就恭謝禮畢一
依南郊例施行至日朕親御宣德門宣制仍令所司詳
定儀注以聞務遵典禮勿俾煩勞咨爾多方咸體予意
故茲札示想宜知悉

東太一宮開啟保夏祝聖壽金錄道場密詞

四月二十

七日

伏以風薰紀候阜庶物以蕃滋道妙無言集百祥而善
應即琳宮之福地考金錄之秘文薦此令芳通乎盱眙

冀延純錫保乃昌圖資壽考於無疆均蠱生而咸被

賜五臺山十寺僧正知令等勅書

五月七日

汝等並懷出俗之心而有愛君之志因王正之肇序遵佛事以脩嚴期申祝延來効誠獻載嘉勤款宜有恩頒

賜天章閣待制知揚州許元詔

五月七日

汝以材敏班余詔條眷乃淮海之濱產茲草木之美以時采掇來効貢輸嘉爾勤誠良深歎獎

天貺節謝內中露香表

五月七日

伏以薰風應候滋阜於羣生嘉節紀時恭承於景貺已
嚴淨館虔奉祕祠仍假薰脩附通精意蒼靈昭鑒純祉
來臻

撫問廣南西路臣寮口宣

五月十七日

卿等並以幹能出分寄任顧此蘊隆之候載嘉宣布之
勤宜示慰存用彰眷遇

除授陳執中行尚書左僕射充觀文殿大學士依
舊判亳州加食邑食實封餘如故仍放朝謝制

六月

十日

門下爵祿之寵所以優老而崇賢退讓之風所以勵俗而敦化眷我元輔殿於近邦屢辭將相之榮備述君臣之遇雖重違懇悃之請而豈無恩意之隆爰告外庭以旌嘉尚具官陳執中質性剛直姿識敏明出於名臣之家早有時材之用自更中外之任實勤夙夜之勞出撫師徒宣威沙漠之外入叅機要竭忠帷幄之間至於兩踐台司首當國論杜門絕請善避權勢以遠嫌處事執

心不為毀譽而更守顧方深於倚信乃祈解於鈞衡兼
秉旄調鼎之榮資鎮俗偃蕃之重所以優逸耆哲養願
精神而數形奏封每以疾告察其誠至良為惻然若夫
中臺之崇端揆是為於師長秘殿之職詢訪實思於老
成推此茂恩俾如汝志仍廣邑封之數即安屏翰之居
於戲壹思慮以專心勤藥石以自輔人實求舊予惟不
忘勉期壽康往服休命可特授行尚書左僕射充觀文
殿大學士依舊判亳州加食邑七百戶食實封三百戶

功臣散官勲封如故仍放朝謝主者施行

宣召曾公亮口宣

六月六日

有勅卿自辭職禁林班條近輔休有政績播於民聲既深簡於予衷俾召還其舊物矧汝材望著於搢紳豈惟潤色之文方佇論思之益

撫問河北路臣寮諸軍將校口宣

七月二日

卿等任膺委寄職在綏寧當茲災沴之餘備著勞能之効俾伸撫慰宜體眷懷

撫問樞密直學士施昌言為患口宣

七月十日

卿方委政條遽聞疾告致爽調和之理豈非夙夜之勞
勉輔天真冀遵藥喜俾伸撫慰式示眷懷

撫問澶州滑州衛州通利軍梅摯等及存恤遂州

軍為水災及防護堤岸口宣


七月七日

卿汝等列蕃宣之重寄罹澍潦之時災顧乃兵民載深隱
惻尚賴班條之善克伸捍患之勞往道子懷俾伸慰撫
萬壽觀延祥殿開啟中元節資薦真宗皇帝道場

青詞

七月七日

伏以道生萬物運元氣於無形節正三元紀清商之令
序洪惟先聖邈矣真遊貽睿業以嗣承增孝思之時感
式陳淨醮仰薦精衷伏願靈馭在天愈資於冥祐寶圖
綿世永庇於羣生



文忠集卷八十四

欽定四庫全書

集部

文忠集卷八十五至

詳校官廉吉臣范逢恩

檢討臣何思鈞覆勘

總校官降調編修臣倉聖脉

校對官檢討臣錢世錫

謄錄監生臣王尚珏

欽定四庫全書

文忠集卷八十五

宋 歐陽修 撰

內制集四

賜昭德軍節度使龐籍并武康軍節度使韓琦龍
神衛四廂都指揮使英州團練使郝質各進奉端

午馬詔勅

七月七日

卿外分寄任方切眷懷屬令節之紀時効駿足而來貢

備彰勤蓋深所歎嘉

賜溪洞進奉乾元節并端午勅書

汝夙被朝恩克綏種落屬茲佳節來効貢儀省乃勤誠
良深歎獎

賜外任臣寮進奉乾元節功德疏詔勅

七月七日

卿汝夙韞材猷出分委寄屬茲誕節來効勤誠載詳善禱
之言彌見愛君之義良深歎尚宜體眷懷

賜外任臣寮進奉助恭謝禮畢銀絹等詔勅

七月二十

五
日

國有大事嚴祀以薦馨臣能盡忠因物而修禮汝卿分職
居外乃心於朝載陳來助之儀深歎勤誠之至

賜武康軍節度使韓琦到闕坐對口宣

八月五日

卿德著耆明時膺材任祇趨召節方及國門宜示頒宣
式彰眷遇

賜新授四方館使依舊英州刺史馬懷德進奉謝

恩馬勅書

八月十日

汝近以疇勞擢陞要職乃求良駿來備貢輸深推報國之誠更俟奮身之効良深嘉獎當悉眷懷

賜知池州包拯進奉石菖蒲一銀合勅書

八月十日

汝識遠言忠身外心內乃因時物來効貢儀深體誠勤益增歎尚

賜新授觀文殿大學士行尚書左僕射陳執中詔

七月二十日

卿出守藩垣自陳疾恙秘殿之職揆路之崇所以褒優

輔臣增重朝體而乃發於誠慤來効貢輸載省恪一作忠

勤但深嘉尚

賜新除資政殿大學士知青州孫沔告勅并對衣

鞍轡馬口宣

八月十六日

卿蔚為名臣久撫方面俾加美職徙領要蕃仍推寵錫之優式示眷懷之厚

賜護國軍三軍將吏僧道百姓等為護國軍節度使樞密使狄青罷政加平章事判陳州示諭勅書

八月十六日

勅護國軍某人等朕以狄青夙無忠勇之姿嘗著勤庸之効自參機務頗歷歲時載深乃眷之懷優以均勞之寵惟命崇於名器蓋體繫於朝廷是加鼎軸之司委以藩垣之任乃人臣之榮遇想輿論之僉諧

賜翰林學士尚書左司郎中知制誥權知審刑院

魯公亮詔

八月十六日

國家致治之難惟刑是恤使民無犯嗟訓導之未純執

法必平顧重輕而宜允卿以精識附一作傳之經術不恃

明而克審既能敏而加勤期於無刑予敢不勉靡有留事爾實為材副乃憂勞良深歎獎

賜尚書刑部員外郎兼侍御史知雜事權判大理

寺郭申錫等勅書

八月十六日

獄重事也余所慎焉五刑之難請比之文毛舉四海之廣報決之書日繁汝以通敏之姿濟之夙夜之力厝刑不用余實慕於前猷俾獄無留汝則能於厥職副我欽

恤良增嘉歎

除劉沆特授行工部尚書充觀文殿大學士知應

天府加食邑實封仍改賜功臣餘如故制

嘉祐元年十一月十一日

月五日

門下罄一節以事君中外之任無間處大臣而有體進退之禮必優矧余輔弼之良方賴股肱之寄屢形懇避嘉敦懃之弗移宜峻寵章示眷懷之特異具官劉沆質性剛鯁姿材敏明早以藝文策俊科於異等遂追髦彥

騰夷路於飛華入必侍以清閒出屢更於事任翼翼是
則有聲京邑之雄巖巖具瞻遂參廊廟之用乃疇嘉績
爰正台司執毀譽不回之心篤於自信勤夙夜匪懈之
志久而益勞顧方厚於倚毗乃遽思於退讓宴見之際
有言而必誠封章之來雖却而復至察其所守實亦重
違惟茲秘殿之嚴眷乃留都之重既增美秩仍益真封
寵我邇臣斯為異數雖如汝志尚東予衷於戲秉國之
鈞居則坐而論道為時舊老往則殿於大邦是惟出處

之榮勉服便蕃之命可特授行工部尚書充觀文殿大學士知應天府加食邑一千戶食實封四百戶仍改賜推誠保德崇仁忠亮功臣散官勲封如故主者施行

替錢

明
逸

賜新除同中書門下平章事判大名府依前彰信

軍節度使李昭亮讓恩命不允詔

十二月五日

卿勲閥之門世承舊德忠勤之節効著厥官惟別都管鑰之嚴兼方面鎮臨之重俾提相印增寵將旌嘉辭讓

之有儀在眷懷而豈易爾無固執往服新恩

賜溪洞進奉助恭謝賀冬賀正水銀綿紬等勅書

十二月
五日

汝世膺朝寵能撫其人時効乃誠善脩其貢載惟忠恪
深用歎嘉

東太一宮開啟年交祝聖壽金錄道場密詞

十二月
十日

伏以三陽肇序始變於凝陰萬壽無疆宜膺於茂祉俾
延淨侶祇歎嚴祠按金錄之仙科格紫清之真馭冀迎

福應永固丕圖下逮庶邦咸均純錫

賜夏國主

一有賙
賙二字
詔十二月二
十五日

詔夏國主喪葬之儀孝子之大節賙賙之禮國家之至
恩眷惟忠順之邦宜厚哀榮之恤緬思荼毒深用惻傷
俾遣使車勉膺慰錫今差文思院使張惟志充弔慰使
兼賜安葬故母物色具如別錄至可領也故茲詔示想
宜知悉冬寒比平安好否書指不多及

正月六日朝辭訖就驛賜契丹賀正旦人使御筵

口宣

十二月二十五日

卿等聘禮有成使軺云復嘉肅祗於將事宜宴飫以勞
勤式示眷懷勉膺寵錫

班荆館賜契丹賀正旦人使却回酒果口宣

卿等載馳瑞節來會王正嘉成禮以言旋念戒塗之伊
始式推寵眷勉服恩頒

賜樞密副使程戡生日詔

嘉祐二年三月四日

卿久罄謀猷叶宣機政眷惟誕日屬此令時宜推寵賚

之優式示顧懷之厚

賜諸道州府軍監及四京恤刑詔勅

朕欲使民知禮義以遠罪而患乎勸戒之未明蠢茲羣

愚猶冒常憲顧此溽暑閔然拘繫

卿汝

夙以敏材外分憂

寄惟刑之恤當體於朕心舉政以時勉思於汝職務從

欽慎庸副哀矜

契丹國信使副回入四月沿路賜夏藥扇子甘蔗

等口宣

三月十九日

卿等載驅使傳言復歸塗顧茲溽暑之辰宜有優恩之
賚俾頒品劑當體眷懷

就驛賜契丹賀乾元節人使內中酒果口宣

卿等將乃聘儀及茲壽節宜示宴私之惠用彰眷寵之
懷推以甘珍體余嘉錫

賜河北東西路邊臣夏藥及傳宣撫問口宣

卿等各以敏材任茲邊寄屬此炎歊之候深惟勤悴之
勞俾頒藥劑之良式示眷懷之厚

東太一宮開啟保夏祝聖金籙道場密詞

四月二十六日

伏以道妙無言惟一資生於萬物歲功有序以時均播
於五行當火德之甚明順南訛而阜育式稽金簡祇即
琳宮祈降集於上靈冀迎來於衆福伏願齊天永算益
保於鴻休觸類賦形皆均於純錫

賜昭德軍節度使檢校太傅知并州龐籍撫諭戒

勅詔

五月二十三日

勅龐籍省所上表麟州申管勾麟府州軍馬司郭恩領

兵過屈野河陷沒待罪事具悉卿以文武之才更將相
之任入籌帷幄早資決勝之謀出撫邊隅方重臨戎之
寄載惟同德可諒宣勤而裨校貪功曾罔虞於萬毒敗
沒銜辱致輕損於國威嘉封奏之上陳能列言而引咎
雖勇夫償於輕敵彼實自貽而智者慮於未形宜無不
備已失難追於既往後圖猶倚於老成勉思節制之方
用副眷懷之厚故茲詔示想宜知悉夏熟卿比平安遣
書指不多及

大相國寺開啟為民祈福道場齋文

伏以薰風協序阜百物以蕃昌慧福均慈蒙萬生而廣
被顧惟編俗屬此煩蒸庶依妙覺之仁護此含靈之衆
祓除時沴迎集天祺凡載坤輿共臻壽域

醴泉觀感通殿開啟為民祈福道場青詞

伏以瑞泉涵液湛一勺之靈源琳館凝華嚴衆真之福
地眷茲炎鬱閱彼蒸黔俾肅按於仙科冀導迎於善氣
伏願紫清昭鑒飈歟來臨旁均海宇之遐下逮羣蠕之

細並蒙道蔭咸被時禧

賜宰臣富弼上第三表乞退不允斷來章批答

省表具之朕眷惟宰輔之司實繫

一作繫

朝廷之重職或

非稱勢因易搖比以連年厭於屢易或用人之不審致
厥位之靡安故於圖任之初尤極精求之意而議者謂
卿有天下之譽慶朕得非常之才豈惟斷不惑於余心
固已慰久鬱之人望則朕之用卿者至矣卿之自待者
何如而方沃嘉猷遽形退讓駭無因而及此曾莫諭於

乃誠豈廊廟之崇責重者其憂難任而富貴之至位高則其慮易危耶朕嘗歷考往昔之人其於進退之際過計而圖全者未必無患忘身而殉國者固多令名惟汝之明必知所擇宜少安於職業用深體於倚毗所乞宜不允仍斷來章

賜兗國公主陳讓恩命第三表不允斷來章手詔

七月
七日

省所三上表陳讓兗國公主事具悉古者周姬下嫁車

服不繫於其夫漢女有封湯沐並開於新邑所以重國家之體隆親愛之恩稽累聖之舊章皆按圖而啟國汝以天姿之甚淑習姆教而已嫻方及有行乃遵先制俾褒賢懿用錫土田而志在撝謙願還渥澤固辭以禮既深體於懇誠承命必恭宜勉祇於寵數所讓宜不允仍斷來章付充國公主

賜賢妃苗氏陳讓恩命第三表不允斷來章批答省所三上表陳讓賢妃事具悉妃嬪之制秩序著於王

宮爵賞之行名數存乎國典舉必謀衆予其敢私眷柔
閒淑慎之賢有輔佐憂勤之德更歲時而維舊列號位
以既隆屬者因築館之將行示緣恩而推寵雖朕心之
乃眷必廷論之曰然而能恪一作封執謙沖深形懇避然
而讓宜有節禮不越於再三命出惟行告已申於中外
往祇休渥母或固辭所讓宜不允仍斷來章付賢妃苗
氏

賜知乾寧軍高遵約獎諭勅書

七月七日

勅高遵約省河北安撫提刑司奏勘會乾寧軍去歲值大雨河水泛漲衝破護城堤渰浸城壁其河岸大段墊壞軍城危急汝乘此水災徑赴本任交割勾當尋計度功料多方用心躬親部役脩築河堤及護城堤至今年三月內了當甚得堅固本軍久遠委不消遷廢伏乞特加旌賞事嚮以暑雨失節悍湍迅流水防廢官衝溢為患汝能奔走就職勤勞匪躬民氓無墊溺之虞壁壘得繕完之固厥効明著攸司以聞載寬憂顧之懷宜示褒

嘉之意故茲獎諭想宜知悉秋熟汝比好否遣書指不
及

福寧公主宅開啟道場青詞

七月十五日

伏以妙道無形宅真靈於杳默精忠有感延福應之純
厖眷外館之有嚴肅行車而伊始俾遵科式祓以芬芳
冀冥祐之敷垂集休寧而永保

內中福寧殿開啟三長月祝聖壽道場青詞

八月二十

六
日

伏以凜秋肅物嘉歲序之成功吉月延祥按仙科之舊
式瞻彼清真之馭敞茲禁密之廷薦以芬芳通於杳默
伏冀壽齡永固福應來臻隆寶厯以遐昌均庶邦而康
靖

玉津園開啟保佑聖躬為民祈福道場青詞

八月二十

五日

伏以祗紹慶圖撫寧

一作摩

方夏仰荷百祥之時集思同

庶品以均休乃即清郊載嚴淨侶誦藥宮之真訓瞻璇

極之高靈伏願聖壽無疆永錫厯鴻之祐物生成遂並
臻康泰之期

南京鴻慶宮開啟皇帝本命道場青詞

九月十三日

伏以寶圖興運茲惟受命之邦琳館凝祥肅奉真遊之
馭惟本元之今日薦精潔之明誠按金籙之科儀瞻紫
霄之杳默伏冀衆靈敷祐百福來臻保遐筭於無疆均
含生之賴德

賜樞密副使田況生日禮物詔

九月十三日

卿夙韞才猷贊吾機務屬涼秋之肅物嘉誕日之屆
一作

戒期宜有寵頒以彰恩眷

班荆館賜契丹國信使副到闕酒果口宣

九月十三日

卿等祇命使軺脩歡隣聘式及都圻之近宜推宴勞之
恩錫以甘芳用彰眷遇

班荆館賜契丹國信使副到闕御筵口宣

卿等肅持聘問協講隣歡涉川陸之甚遐戒郊圻而茲
始宜申宴犒用示眷優

玉津園賜契丹國信使副弓箭御筵口宣

卿等薦脩聘好方憩輜軒肅射圃以有儀豐宴邊而加
品膺茲寵錫式體眷懷

雄州白溝驛賜北朝契丹賀正旦人使御筵兼傳
宣撫問口宣

卿等言飭使輅時脩聘好涉此沍寒之候載惟行李之
勤宜示宴慈用彰眷撫

文忠集卷八十五

欽定四庫全書

文忠集卷八十六

宋 歐陽修 撰

內制集五

賜樞密使山南東道節度使同中書門下平章事

賈昌朝生日禮物口宣

九月五日

卿位峻樞庭望崇舊老屬誕期之斯及顧寵數以宜優
體乃眷懷膺茲蕃錫

皇帝賀契丹皇帝正旦書

正月一日伯大宋皇帝致書于姪大契丹聖文神武睿
孝皇帝闕下玉歷正時布王春而茲始寶隣敦契講信
聘以交修方履新陽益綏多福其於祝詠罔罄敷言今
差朝散大夫守太常少卿上騎都尉渤海縣開國男食
邑三百戶賜紫金魚袋吳中復供備庫使銀青榮祿大
夫檢校太子賓客兼御史大夫騎都尉廣平縣開國男食
邑三百戶宋孟孫充正旦國信使副有少禮物具諸別

幅專奉書陳賀不宣白

皇帝賀契丹太皇太后正旦書

正月一日姪大宋皇帝謹致書于嬪大契丹仁慈聖善欽
孝廣德安靜正淳懿和寬厚崇覺儀天太皇太后闕下
歲律更新春陽鬯達因履端之叶吉敷永好以申歡載
惟慈懿之和方集壽康之祉更希善攝用副遐悰今差
朝散大夫守太常少卿直昭文館護軍廣陵縣開國子
食邑五百戶賜紫金魚袋呂景初洛苑使兼閭門通

事舍人銀青崇祿大夫檢校太子賓客兼御史大夫騎都尉清河郡開國侯食邑一千七百戶張利一充正旦國信使副有少禮物具諸別幅專奉書陳賀不宣謹白

賜知潁州徐宗況進奉賀充國公主出降銀絹馬等勅書

勅徐宗況省所進奉賀充國公主出降絹五百疋事具悉詩稱王姬之下嫁國著嘉禮而有儀惟臣職之聿脩備物容而叙慶誠勤所至歎尚良深故茲示諭想宜知

悉冬寒汝比好否遣書指不多及

賜知建昌軍沈造勅書

勅沈造省所進奉銀珠稻米一十石計一百黃絹袋事
具悉汝職守軍符政兼民穡樂此有秋之實擇其嘉穀
之英式陳常貢之儀彌體恪官之意故茲示諭想宜知
悉冬寒汝比好否遣書指不多及

集禧觀凝祥池崇禧殿開啟祝聖壽年交金錄道

場密詞

十二月十日

伏以璇霄默運推四序以循行玉厯更新集萬靈而交
會俾清琳宇延格高真薦茲精一之誠祈乃純厖之祉
冀縣福祚均及含生

班荆館賜契丹賀正旦人使到闕酒果口宣

日
月十二

卿等歲律更端隣歡交聘載馳使傳方及國郊宜推寵
錫之恩式示眷懷之厚

瓊林苑開啟保祐聖躬祈福道場青詞

月十二

二日

伏以四時成歲嘉庶彙之咸新百福自天荷衆真之冥
貺俾開靈囿恭講仙科恢寶祚之延長錫壽康之遐永是
惟降鑒享乃克誠

瓊林苑開啓保佑聖躬祈福道場默表

伏以荷天地之鴻休席祖宗之丕業載惟勵翼敢怠憂
勤屬歲律之更端冀時禧之茂集俾嚴禁禦祇率舊章
庶通芬潔之誠仰格清真之馭伏冀錫齡斯永降福孔

多保邦祚於無窮均物生而咸被

啓聖院齋殿內權奉明德元德章穆皇后今告遷
赴普安院重徽隆福兩殿奉安祝文

嚮以雨水為災殿塗增緝亦既新於叢構庶來復於真
遊爰揆靈辰冀茲安妥緬惟慈佑丕鑒乃誠

皇帝親詣啓聖禪院告遷明德元德章穆皇后赴
普安院奉安祝文

嚮者因霖災之為沴飭殿構以增新涓穀旦之惟良奉

神遊而還止載深感慕躬薦芬馨式慰孝思冀茲臨格
正月三日就驛賜契丹賀正旦人使內中酒果口宣
卿等奉將隣好來會歲元載推一作惟寵賚之私宜極珍
豐之品俾頒嘉味式侑宴歡

瓊林苑交年禱祭太歲諸神祝文

天行有度運三統以環周歲德所臨從百神而拱列載
涓穀旦薦此令芳惟陰鑒之享誠委時祥而昭佑

班荆館賜契丹賀正旦人使到闕御筵口宣

十二月十二

四日

卿等歷紀歲元聘交隣好載馳使傳方及國門宜頒宴

搞一作推之恩式示眷懷之厚

寵錫

賜夏國主進奉賀正馬馳詔

詔夏國主省所差人進奉賀正馬馳共一百頭足事具
悉履端紀歲萬邦咸稟於王正効貢以時奕世克修於
藩職載閱充庭之實深惟守土之勤遐體傾輸不忘歎
獎今因賜銀絹茶等具如別錄至可領也其差來人所

賜物色亦具賜目故茲詔示想宜知悉春寒比平安好
否書指不多及

賜夏國主贖大藏經詔

十二月
日

詔夏國主省所奏伏為新建精藍載請贖大藏經帙籤
牌等其常例馬七十疋充印造工直俟來年冬賀嘉祐
四年正旦使次附進至時乞給賜藏經事具悉封奏聿
來祕文為請惟覺雄之演說推善利於無窮嘉乃純誠
果於篤信所宜開允當體眷懷所載請贖大藏經帙籤

牌等已令印造候嘉祐四年正旦進奉人到闕至時給付故茲詔示想宜知悉春寒比平安好否書指不多及

賜新除觀文殿學士禮部侍郎孫沔詔

嘉祐三年正月十七

日

勅孫沔省所上表伏蒙聖慈差使臣賁到誥勅各一道授臣觀文殿學士禮部侍郎并賜對衣金帶鞍轡馬錢五百貫文不敢恭受伏乞特改差臣知一小郡或依例除一官致仕陳乞事具悉卿蔚有敏材膺予簡任外

分邊寄嘗著於恩威入贊國機早參於帷幄風猷甚美
寵遇既優適當擇帥之初方鑒用謀之失是惟慎舉實
允僉諧豈宜圖自便之私而罔體眷懷之意顧茲重地
難久曠官往祗成命之行當略好譏之節所讓宜不允
依前降指揮疾速發赴本任故茲詔示想宜知悉

集禧觀奉神殿開啓謝雪道場青詞

近以溫陽干時雨雪愆候載惟寡薄敢罄精純明靈孔
昭嘉應斯獲兆豐年而有望消癘氣於未形惟物蒙休

以時申報冀清真之來格期福貺之永依

自京至雄州已來撫問契丹告哀人使口宣

正月十九日

卿祇戒輶軒載馳隣訃顧道塗之甚邈惟涉履之斯勤
俾宣恩言式慰良苦

賜契丹國告哀人使茶藥口宣

正月十九日

卿式將隣聘來告國哀屬春候之尚寒顧驛塗之攸邈
俾頒品劑用示眷懷

沿路賜契丹國告哀人使赴闕茶藥口宣

正月十九日

勅蕭福延卿夙駕使輜遽傳國卹屬餘寒之在候想馳
驛之為勞俾頒飲劑之良用示眷懷之厚

景靈宮雅飾元天大聖后聖容并侍從等開啓預

告道場青詞

正月二十日

伏以珍宇邃嚴奉真靈而有素玉容清穆謹修祓以惟
時爰按仙科俾伸虔告載瞻道蔭宜鑒沖誠

皇帝回契丹皇帝告哀書

二月日伯大宋皇帝致書于姪大契丹聖文神武睿孝
皇帝闕下承遣使車特貽緘翰不意凶變太皇太后上
僊載惟契好久睦仁鄰聞此訃音但增感愴姪皇帝負
荷至重追慕所深冀節哀情用遵禮制已差人使專持
慰禮今林牙懷德軍節度使蕭福延回奉書陳謝不宣
白

雄州撫問契丹賀乾元節人使口宣

二月二十四日

卿等夙持信聘來講隣歡及疆候以惟初屬暄和之方
盛宜加撫慰式示眷懷

賜給事中叅知政事曾公亮生日詔

二月二十五日

卿蔚有時望叅于柄臣惟倚注之所深在眷顧之尤異
屬茲誕日宜爾壽期膺此寵頒體予至意

賜翰林學士兼侍讀學士尚書戶部郎中知制誥

知審刑院胡宿詔

三月三日

勅胡宿省所奏據大理寺日奏司申二月二十一日已

前下寺公案並已斷奏了畢無見在事具悉朕欲斯民
足衣食知禮讓而竊攘爭鬪之獄猶滋欲吾吏慎刑罰
盡情偽而傳予輕重之文不一卿以儒學之職總評讞
之繁克勤其官曾不留事實副予意惟時可嘉若乃使
天下囹圄空虛而風流篤厚是亦論思獻納者之志其
勉助我以共臻焉仍依奏宣付史館故茲獎諭想宜知悉
賜判大理寺陳太素并權少卿楊開及審刑院詳

議官大理寺詳斷官等勅書

三月三日

勅陳太素省知審刑院胡宿奏據大理寺日奏司申二月二十一日已前下寺公案並已斷奏了畢無見在事刑獄之重一成而不遷比類之微可疑者甚衆汝好學而敏蒞官以勤夫俾天下之無冤幾刑錯而不用此朕翼翼希慕之所未及而爾孜孜厥職之所不忘者也故茲獎諭想宜知悉

恩州賜契丹遺留使副茶藥口宣

三月二十八日

卿等夙馳使傳來達信函載惟涉履之勤當此暄和之

候宜加頒賚式示眷懷

瀛州賜契丹賀乾元節人使却回御筵口宣

四月

日七

卿等既成聘好方即歸塗再惟將命之勞宜有犒勤之錫
俾伸宴飫用示眷私

班荆館賜契丹賀乾元節人使却回酒果口宣

四月

日七

卿等使軺復命郊館餞行惟茲良潔之英薦以甘馨之

實用伸恩錫當體眷懷

十六日就驛賜契丹賀乾元節人使內中酒果口

宣

四月十七日

卿等夙奉信函方休賓館惟此醇甘之品用推寵賚之恩聊侑宴歡以伸優遇

賜知舒州齊廓進新茶并知廣德軍浦延熙進先春茶勅書

勅齊廓省所進奉新茶一銀合合重五十兩緋羅夾複

全事具悉百物茂生取新為貴羣方修職効貢以時汝
守土有方事上惟恪閱茲來獻用體勤誠故茲示諭想
宜知悉

賜外任臣寮進奉乾元節銀絹馬勅書

勅高易簡省所進奉乾元節絹五百疋事具悉汝夙以
敏材膺于簡寄及此奉觴之節載陳任土之儀能因物
以達誠見事君之甚恪省閱于再歎嘉不忘故茲示諭
想宜知悉

班荆館賜契丹告哀人使內中酒果口宣

卿夙將隣訃方屆國門載惟衝涉之勤宜有宴休之錫

俾伸頒賚用示眷優

一作懷

開寶寺福勝院開啓道場於乾元節日支散袈裟
并設大會齋一中齋文

伏以正陽旅月方及於嘉時萬壽齊天式標於令節啓
真乘之祕藏集淨侶於法筵仰惟慈妙之仁茂委純厯
之祉永隆丕算均福羣倫

東太一宮開啓保夏祝聖壽金籙道場密詞

四月二十

四日

伏以寂然妙道推善應以無方瞻彼高靈薦精誠而必
達屆此長嬴之候是惟茂育之時爰稽玉笈之真文載
潔雲壇之淨醮冀敷昭鑒來集純禧固壽厯之延昌溥
蒼黔而均祐

賜彰信軍節度使檢校太保同中書門下平章事
判大名府李昭亮乞知西京不允詔

勅昭亮省所上表乞移判河南府事具悉朕惟魏洛之
重皆為別都將率所居難於屢易卿以中外勤勞之績
有撫綏扞禦之材自膺寄任之雄方厚倚毗之意遽茲
列奏嘉乃好謙宜體眷懷靖安爾位所乞宜不允故茲
詔示想宜知悉夏熟卿比平安好遣書指不多及

賜宣徽南院使淮康軍節度使張堯佐乞知西京

不允詔

五月
二日

勅堯佐省所奏臣皇祐三年內授宣徽南院使判河陽

軍州事未滿任蒙詔赴闕供職至今六載自量尸素深
不遑寧近知西京闕人未有除授伏望特賜差委事具
悉宣導徽猷任親而事簡居留京邑地要而務繁惟予
眷遇之臣方處清閒之職載披來牘深識乃誠雖奮其
聰明尚足以臨蒞而待我耆艾宜有以優游實嘉盡瘁
之心難徇撝謙之意所乞宜不允故茲詔示想宜知悉

賜宰臣文彥博上第一表乞解重任不允批答

五月

省表具知夫知其人之為賢任則勿貳事其君而有道
去不可輕此古之臣主之明舉措必慎所以收功於一
時而垂法於後世也卿夙有時望為予柄臣自復秉於
國鈞僅三周於歲序若乃進退賢否誅賞罪功每於聽
納之間敢忘虛已顧彼搢紳之論曾靡異辭方期有成
以副予意而乃過形謙損思避台衡豈寡德弗明於用
才而不盡將多言害正致厥位之難安苟異於斯夫何
引讓矧卿忠信之節足以叶予之一心材謀之優可以

斷予之大事茲所簡注寧煩諭言所請宜不允

就驛賜契丹遺留使副銀鈔鑼唾孟子錦被褥

口宣

五月十八日

卿等馳輶來止將命有儀顧茲館憩之初宜具燕私之用俾伸優錫式示眷懷

通商茶法詔

嘉祐四年二月四日

勅古者山澤之利與民共之故民足於下而君裕於上國家無事刑罰以清自唐末流始有茶禁上下規利垂

二百年如聞比來為患益甚民被誅求之困日惟咨嗟

官受濫惡之入歲以陳積私藏盜販犯者實

一作實

繁嚴

刑重誅情所不忍使田間不安其業商賈不通于行鳴

呼若茲是於江湖之間幅員數千里為陷穽以害吾民

也朕心惻然念此久矣間遣使者徃就問之而皆歡然

願弛權法歲入之課以時上官一二近臣件析其狀朕

嘉覽于再猶若歟然又於歲輸裁減其數使得饒阜以

相為生剋去禁條俾通商賈歷世之弊一旦以除著為

經常弗復更制損上益下以休吾民尚慮喜於立異之人緣而為姦之黨妄陳奏議以惑官司必寘明刑用戒狂謬布告遐邇體朕意焉

文忠集卷八十六

欽定四庫全書

文忠集卷八十七

宋 歐陽修 撰

內制集六

恩州賜契丹皇太后賀乾元節大使茶藥詔

嘉祐四年

二月二十四日

卿夙將信聘方止中塗惟茲藥錄之良加之

一作茗品

之美特伸頒

一作恩

賚式示眷懷

恩州賜契丹皇太后賀乾元節副使茶藥詔

同日

卿肅將聘幣來及壽觴載嘉道路之勤宜有頒宣之寵
仍伸撫勞當體眷優

恩州賜契丹皇帝賀乾元節大使茶藥詔

同日

卿將命寶隣講歡壽節屬此暄和之候載惟涉履之勤
宜頒品劑之良式示眷懷之意

恩州賜契丹皇帝賀乾元節副使茶藥詔

同日

卿夙副聘軺來陳壽祝顧川塗之攸邈屬氣節之方和

俾頒飲餌之精式助宣調之理

端午帖子

皇帝閣六首

其一

天容清永畫風色秀含薰五日逢佳節千齡奉聖君

其二

綵索盤中結楊梅粽裏紅宮闈九重樂風俗萬方同

其三

寶典標靈日明離正午方五行當火德萬壽續天長

其四

歲時令節多休宴風俗靈辰重祓禳肅穆皇居百神衛
滌邪寧待浴蘭湯

其五

香菰黏米著佳名古俗相傳豈足矜天子明堂遵月令
含桃初薦黍新登

其六

聖主憂勤致治平仁風恩澤被羣生自然四海歸文德
何用靈符號辟兵

皇后閣五首

其一

繭館覆柔桑新絲引更長紉為五色縷續壽獻君王

其二

槐綠陰初合榴繁艷欲然翠筒傳角黍嘉節慶年年

其三

烟含玉樹風生細
日永宮花漏出遲
深殿未嘗知暑氣
水精簾拂砌琉璃

其四

玉壺永彩瑩寒光
避暑宸遊樂未央
采艾不須禳毒沴
塗椒自己馥清香

其五

蘭苔擢秀迎風紫
槿豔繁開照日紅
嘉節相望傳有舊
深宮行樂自無窮

溫成閣四首

其一

香黍筒為稷靈苗艾作人芳音邈已遠節物自常新

其二

珠箔涼颺入金壺晝刻長鸞臺塵不動銷盡故時香

其三

聞說仙家事杳微世傳真偽豈能知遙思海上三山樂
寧記人間五日時

其四

雲散風流歲月遷君恩曾不減當年非因掩面留遺愛
自為難忘窈窕賢

夫人閣五首

其一

冰壺疑皓彩水殿漾輕漣繡繭誇新巧紫絲喜續年

其二

黃金仙杏粉赤玉海榴房共闢今朝勝盈檐百草香

其三

光風細細飄香轉綠葉陰陰覆檻涼雲物鮮明時節麗
水精宮殿侍君王

其四

蓬萊仙闕彩雲中端日一作午欣逢歲歲同皎潔霜紈空

詠扇深沉玉宇自生風

其五

古今風俗記佳辰樂事深宮日日新巧女金盤絲五色

皇家玉厯壽千春

皇帝回契丹皇帝賀乾元節書

四月日伯大宋皇帝致書于姪大契丹聖文神武睿孝
皇帝闕下乾陽正月紀茲載誕之辰隣聘修歡貺以千
齡之祝書言既縟禮幣兼豐感著之私敷陳罔罄今彰
聖軍節度使蕭供等回專奉書陳謝不宣白

皇帝回契丹皇帝達皇太后賀乾元節書

四月日伯大宋皇帝致書於姪大契丹聖文神武 孝

皇帝闕下壽節屆期隣歡惇契仍導柔慈之旨過申延
祝之言兼厚物容用增刻著顯希侍次達此悰誠今左
監門衛上將軍耶律侶等回專奉書陳謝不宣白

恩州賜契丹皇太后賀乾元節人使茶藥口宣

卿等夙奉信函及茲誕節載勤馳傳方止中塗宜有寵
頒用伸撫慰

恩州賜契丹皇帝賀乾元節人使茶藥口宣

卿等甫臨誕日來講隣歡載惟將命之嚴宜有勞勤之

錫俾伸寵賚式示眷嘉

天齊仁聖帝廟開啓祈祥迎福催生金錄道場密

詞三月二
十日

伏以高穹降慶方垂佑於邦家彌月告期用薦誠於科
錄冀衆真之昭鑒臻百順以儲休

廣聖宮開啓催生道場默表

三月二
十日

伏以帶韞迎祥慶禡祠之叶應潔壇修薦致精懇以冥
祈俾因麟瑞以通誠仰冀靈真之報福

內中福寧殿開啓天祺節道場青詞

三月二十日

伏以候臨清燠節紀嘉名肅嚴秘殿之居降集清真之
馭薦之馨苾報以善祥宜惟敷佑於眇躬兼冀均休於
庶品

內中福寧殿罷散天祺節道場青詞

同日

伏以薰風應候瑞節紀時按琳簡之真文嚴紫庭之邃
宇衆靈來格寘感交通嘉乃羣生蒙茲百福載傾虔意
鑒此明誠

後苑親政殿開建鎮星祈福道場青詞

二月二十日

伏以祠謀叶應彌月告祥肅依科錄以薦誠仰冀照臨之降鑒錫之祉福佑以休

一作保

寧惟集慶於邦家永延

鴻於基緒

萬壽觀開啓求嗣保安道場青詞

伏以廟社降祥宮庭叶慶載涓吉旦交薦明誠期仰格於清真俾敷延於祉福永昌基祚遐企靈休

景靈宮天興殿開啓催生保慶道場青詞

伏以誕彌叶慶蠲潔修誠嚴祕殿於靈宮誦真文於藥
簡通此苾芬一作芳之薦祓其舊害之虞仰冀昭回丕符
鑒祐

護國顯應公廟開啓保安催生道場青詞

伏以正陽旅月載育開祥式因靈宇之嚴交薦精衷之
潔仰冀衆真之貺敷昭百順之休永祚皇圖實希道蔭
賜新除行刑部尚書依前觀文殿大學士知陳州

劉沆讓恩命不允詔

四月五日

卿嚮以宰弼之崇屢形懇避居留之任因用均勞而休
風藹然嘉問時至方深眷倚遽閱奏封顧惟陪輔之邦
俾遂便安之請增之美秩優我舊臣豈祇循於故常蓋
以示夫褒寵膺受之際逡巡以辭雖言匪飾文見於能
讓而令行已出難以復還其體余懷徃祇新命

雄州白溝驛賜契丹賀乾元節人使却回御筵兼

撫問口宣

四月十三日

卿等聘函時達使傳言旋冒茲炎燠之辰涉此川塗之

邇宜申宴錫式示眷懷

賜中書門下戒僭奢詔

五月四日

勅中書門下朕續承丕基撫有方夏謂教之不可以家
至而行之每務於身先惟是儉勤敢忘勉勵期與羣庶
臻于富康而人殆久安驕於佚欲物豐太盛耗以浮虛
苟奉養以自私忘僭奢之為戾士民交黷貴賤靡分惟
其彊力之能無復等威之制考於著令雖有舊章顧在
攸司鮮聞用法民遂安於常習弊罔革以滋深紀綱既

紊於度程風俗以至於流蕩俾朕有欲治之意不能副
余之誠心而民多自陷之愚未免煩余之訓導夫令信
由於貴始下化先於上行眷予一二之臣其率庶工而
警職俾爾多方之衆勿踰常憲一作法以干刑庶漸革於

侈風以共趨於治路凡居室之制器用之度冠服之章
妾媵之數其令中外臣庶遵守前後條詔如有違犯仰
御史臺及開封府糾察聞奏其諸路州軍即委轉運使
提點刑獄臣寮及逐處長吏施行布告中外咸使聞知

故茲詔示想宜知悉

西太一宮續催生道場密詞

四月二十六日

伏以吉月迎祥靈謀叶應爰即清真之宇虔脩科式之儀冀板滌於害災俾敷昭於福應載昌儲慶永佑基圖

東太一宮開啓保夏祝聖壽金錄道場密詞

四月二十日

六日

伏以珍館邃嚴格真靈而來宅明誠蠲潔薦馨苾以交修導迎百順之祥及此長羸之序伏願保圖綿固壽厯

延長永敷佑於邦家溥均休於品庶

為將來祫享禮畢奏謝內中福寧殿并景靈宮等

處諸神表

六月二十五日

伏以清廟有嚴仲冬正序乃先時祭躬講禮文賴真靈之集休俾容典之咸舉仰膺佳貺彌勵丹衷

為將來祫享禮畢奏謝諸寺院表

同日

伏以宗廟之嚴祭祀惟重矧茲合食之義尤為盛禮之文乃顧眇躬克成大饗實繫貺祐用薦非儀

內中為將來祫享禮畢奏謝露香表

同日

伏以月正仲冬禮成大饗所以序昭穆之位格祖宗之靈荷清穹之降休俾盛典之獲舉敢伸昭謝冀達精衷

為將來祫享禮畢奏謝諸寺院神御表

同日

伏以茲者祇率孝心躬修合祭潔精誠而是薦蒙顧享之來臨惟慈聖之降休俾眇冲之成禮敢忘勵翼永荷基圖

為將來祫享禮畢奏謝永安陵等處表

同日

伏以恭承先烈，獲守慶基。式因冬物之有成，載肅廟容而合食。上繫丕貺，克展孝思。惟是感慕之誠，益勵祇寅之志。

為將來祫享禮畢，奏謝泰山廟等處表。

同日

伏以茲者因歲物之冬成，講祭容而時舉。豆籩有序，禮樂交修。顧惟眇躬，克遵盛典。實賴明靈之佑，敢忘報貺之誠。

賜步軍副都指揮使涇州觀察使秦鳳路副都部

署王凱赴闕茶藥口宣

六月二十五日

卿祇膺召節方屆都畿載惟道路之勤屬此炎薰之候

宜頒良劑式示眷懷

賜步軍副都指揮使涇州觀察使秦鳳路副都部

署王凱赴闕生料口宣

同日

卿出膺邊寄入恪覲容顧就館以云初方奉主而來見
宜頒餼勞式示眷懷

除宋庠制

加恩進封

門下盡其志以饗親因而餞惠爵于朝而示衆所以褒
功考祭典而可稽著國章而有舊矧乃樞機之任惟余
鼎脩之臣飭事齊莊宣力左右方此慶行之始宜推寵
數之隆推忠協謀同德佐理功臣樞密使開府儀同三
司檢校太尉行兵部尚書同中書門下平章事兼羣牧
制置使上柱國廣平郡開國公食邑七千八百戶食實
封二千九百戶宋庠履行清純器識深茂夙有佳譽蔚
為名臣文足以為國華學足以謀王體入則登于三事

備罄謨猷出則殿于大邦藹存風績自還幾務頗厯歲
時秉一德以易恭出處不更其守展四體而盡瘁夙夜
匪懈其勞屬盛禮之有成廣推恩而自近按夫輿地特
啓于新封加以寵名蓋遵於故事惟是便蕃之錫式伸
眷倚之懷於戲君子者邦之基大臣者民之表搢紳之
望所屬老成德業之隆豈煩多訓服我休命往惟欽哉
可特授依前檢校太尉行兵部尚書同中書門下平章
事兼羣牧制置使充樞密使特封莒國公仍賜推忠協

謀同德守正佐理功臣散官勲食實封如故主者施行

除李昭亮制

加恩

門下朕卜吉孟冬躬薦清廟祖考來格既以百福之多
慶賜遂行均于四海之廣惟予將相之任是謂股肱之
良宜擇剛辰誕揚休命忠果守正佐運翊戴功臣彰信
軍節度曹州管內觀察處置等使開府儀同三司檢校
太保同中書門下平章事持節曹州諸軍事行曹州刺
史上柱國隴西郡開國公食邑一萬一千五百戶食實

封三千四百戶李昭亮志尚純慤資識敏明世蒙舊德
之餘早邁重熙之盛備于器使奮厥材猷好學詩書知
將率之為體兼推威信撫士卒以克和入則有宿衛之
勤出則著扞城之效寄之方面屢守於要藩班乃政條
頗一作頻聞於佳譽乃眷別都之重實司留鑰之嚴擁節

秉鈞並享崇高之貴治戎撫俗兼資鎮靜之材茲惟圖
任之艱方屬倚毗之意是用因需思之浹洽推異數之
便蕃廣乃䟽封增其真戶仍疇美績褒以嘉名於戲秉

德不回所以見始終之操好謙自守乃能居寵祿之榮
汝其欽哉膺此優渥可特授依前檢校太保同中書門
下平章事使持節曹州諸軍事行曹州刺史充彰信軍
節度曹州管内觀察處置等使加食邑七百戶食實封
四百戶仍賜推誠保德守正佐運翊戴功臣散官勲封
如故王者施行

除梁適制

特授特
進加恩

門下王者嚴其宗廟饗必及其時盡其誠心祭則受其

福朕躬執圭瓚率諸臣工因百物之成冬格列聖而合
食嘉與有位之衆均茲錫祉之繁矧惟槐鼎之舊臣實
繫國家之大體宜優新命以告外庭推誠保德忠亮翊
戴功臣定國軍節度同州管內觀察處置等使光祿大
夫檢校太傅使持節同州諸軍事同州刺史兼御史大
夫上柱國安定郡開國公食邑四千七百戶食實封一
千五百戶梁適世胄之華早躋仕路藝文自奮繼踐辭
科進階顯榮亟被獎擢優游侍從之列嘗奉於清閒出

入中外之勤實勞於夙夜既贊樞府遂登宰司啓沃之
謀話言猶在進退之際禮遇兼隆自歷藩垣頗更歲月
近惟大虜實宿勁兵倂分節制之權以為方面之重撫
茲雅俗藉爾敏材屬熙事之有成均慶恩而方洽是用
叙陟崇階之貴兼增食戶之多推茲寵章蓋率舊典於
戲執忠信之一節所以事君守富貴而不驕乃能終吉
是惟素學寧假訓辭往服茂恩當體予意可特授特進
依前檢校太傅使持節同州諸軍事行同州刺史兼御

史大夫充定國軍節度同州管内觀察處置等使加食
邑七百戶功臣勲封如故主者施行

除許懷德制

加恩

門下賞以懋功俾有能之知勸祭之為澤思在位以咸
均嘉盛禮之斯成務推恩而惟廣矧乃耆明之哲是為
心膂之臣宜示優隆式揚誕告衛聖忠果雄勇翊戴功
臣殿前都指揮使保寧軍節度婺州管内觀察處置等
使特進檢校尚書左僕射使持節婺州諸軍行婺州刺

史兼御史大夫上柱國潁川郡開國公食邑五千戶食
實封一千二百戶許懷德勁勇之質蓋稟天姿忠厚之
良自為國器少有四方之志出逢千載之辰蘊其材謀
能自奮勵訓我士卒號令之信甚明為予爪牙介冑之
色難紀爰採軍中之譽俾分闌一作閫外之權遂膺旌節
之榮專董貔貅之旅宿衛宮禁周旋歲時宣力甚勤有
知無不為之節盡瘁後已加老而益壯之心誠未耗於
精明豈但矜於矍鑠屬受釐之均慶方決宇以蒙休載

推圖舊之懷式叙疇勞之典益其封食錄乃功庸於戲
享爵祿之崇高荷寵靈之優渥挺金石不渝之操茲惟
事上之誠知富貴克守之難用保有終之吉勉矣來効
徃其欽哉可特授依前檢校尚書左僕射使持節婺州
諸軍事行婺州刺史兼御史大夫充殿前都指揮使保
寧軍節度婺州管内觀察處置等使加食邑七百戶食
實封三百戶仍賜衛聖忠果雄勇宣力翊戴功臣散官
勲封如故主者施行

翼祖皇帝冊文

維嘉祐四年歲次己亥十月壬戌朔十二日癸酉孝曾
孫嗣皇帝臣某敢昭告于高祖翼祖簡恭睿德皇帝伏
以皇天眷命興德造邦始基之功實自積累獲嗣丕烈
敢忘翼勵孟冬吉月歲事既成合祭以時舉茲禮典惟
是備物將以誠懇之心神其歆之錫以多福謹以一元
大武柔毛剛鬣粢盛薌合薌其嘉蔬嘉薦醴齊嚴恭備
物式薦虔心高祖妣簡恭皇后劉氏配尚饗

真宗皇帝冊文

維嘉祐四年歲次己亥十月壬戌朔十二日癸酉孝子
嗣皇帝臣某敢昭告于皇考真宗膺符稽古成功讓德
文明武定章聖元孝皇帝伏以古之以孝而饗親者氣
節既至感其思心祠禴嘗烝禮以時舉然猶未厭其志
也則又大合祖宗而享焉顧惟小子克守成業治民事
神動有丕訓是用躬執圭瓚薦其芬芳佩一作愜然如
又作慨聞來格來貺謹以一元大武柔毛剛鬣粢盛薌合薌萁

嘉蔬嘉薦醴齊嚴恭備物式薦虔心皇妣章穆皇后郭氏皇妣章獻明肅皇后劉氏皇妣章懿皇后李氏配尚饗

淑德皇后冊文

維嘉祐四年歲次己亥十月壬戌朔十二日癸酉孝孫嗣皇帝臣某敢昭告于皇祖妣淑德皇后尹氏伏以彤管有煒內德茂焉清廟載嚴合食為重十月惟吉備物有容威靈來臨昭穆序配薦以誠潔神其顧思謹以一

元大武柔毛剛鬣染盛鄉合鄉其嘉疏嘉薦醴齊嚴恭
備物式薦虔心尚饗

賜樞密使宋庠讓恩命第一表不允批答

省表具之朕以因時致享克展於孝思已祭受釐大均
於慶澤乃眷耆明之哲實予體貌之臣肅臨事之有容
既交神而蒙貺宜推異數以示眷懷雖嘉好謙曷止成
命所讓宜不允

賜樞密使宋庠讓恩命第二表不允斷來章批答

省表具之卿蘊純和端慤之誠富敏瞻通明之學惟時
舊德實我柄臣當祀事之有成廣慶恩而方洽疇其封
爵錫以號名茲為寵章蓋舉常典無煩避讓其往欽承
所讓宜不允仍斷來章

賜樞密使宋庠讓恩命第一表批答口宣

熙事既成方大均於祭澤寵章所異宜首及於樞臣當
即往膺勿煩沖讓

賜樞密使宋庠并河陽三城節度使判河南府文

彥博加恩告勅口宣

朕以饗親致孝餽惠均恩宜有寵章以褒舊德往欽新命當體眷懷

閣門賜華原郡王允良感德軍節度使允初告勅口宣

蔚為賢王陪我祀事既膺福貺宜被寵靈往體予懷祇服新命

賜皇弟奉寧軍節度使華原郡王允良讓恩命第

一表不允批答

朕合食祖考以昭孝推恩宗族以展親所以厚人倫明教愛卿以近屬肅然在庭能盡志以修容不違禮而終事方慶典之均洽宜寵章之所先好謙之懷雖可嘉尚已出之命其往欽承

賜皇弟奉寧軍節度使華原郡王允良讓恩命第二表不允斷來章批答

卿擢秀宗英作屏王室從我祀事罄其齊明因餽惠之

均恩示推仁而睦族避讓之節固已識於沖懷敦諭既勤宜往祇於成命

賜皇弟感德軍節度使允初讓恩命第一表不允
批答

朕因時孟冬薦鬯清廟蒙祖考之來貺均慶賜以推行
乃眷宗藩宜優寵數蓋克遵於舊典何過自於撝謙其
欽訓言往服休命

賜皇弟感德軍節度使允初讓恩命第二表不允

斷來章批答

朕親款太宮致饗列聖蒙神貺其百福思慶及於多方
乃眷宗藩宜優異數惟是便蕃之錫式推敦睦之仁嘉
乃沖懷形于懇避禮有常節無為過恭命之已行難或
中止

賜皇弟華原郡王允良感德軍節度允初讓恩命第
一表不允批答口宣

卿以宗藩之近參闕祀之嚴爰疇乃勞優以異數宜思

祇受勿復固辭

賜皇弟華原郡王允良感德軍節度使允初讓恩
命第二表不允斷來章批答口宣

卿以宗支之賢陪廟祀之重均茲慶典遽述讓誠命出
已行理難中止所宜祇受以副予懷

文忠集卷八十七